




**Ն.Ս.Օ.Տ.Տ. ՓԱՐԵՓԻՆ Բ ԱՄԵՆԱՅՆ ՀԱՅՈՅ ԿԱԹՈՂԻԿՈՍԻ
ԽՈՍՔԸ ԿՐԹՈՒԹՅԱՆ ՄՇԱԿՆԵՐԻ ՕՐՀՆՈՒԹՅԱՆ
ԱՐԱՐՈՂՈՒԹՅԱՆ ԱՌԻԹՈՎ**

(31 օգոստոսի 2023 թ.)

*Սիրելի՛ մանկավարժներ,
Կրթադաստիարակչական առաքելության պատասխանատուներ,
Ողջունում ենք ձեզ Մայր Աթոռ Սուրբ Էջմիածնում եւ Հայրապետա-
կան Մեր օրհնությունն ու բարեմաղթանքները բերում ամենքիդ ուսում-
նական նոր տարվա մեկնարկի առիթով: Այսօր Սուրբ Էջմիածնում ուխտի
վերանորոգության օր է ձեզ համար՝ զորանալու հավատքով եւ նվիրյալ
ձեր աշխատանքով Սահակ-Մեսրոպյան ոգով կրթելու մեր ազգի զավակ-
ներին ու նպաստելու հայոց պետականության ամրապնդմանն ու ազգա-
յին մեր կյանքի բարգավաճմանը:*

*Դարերի ընթացքում մտքի եւ հոգու լուսավորությունը մշտապես
եղել է եւ է Հայոց Եկեղեցու հոգեփրկչական ու ազգապահպան առաքե-
լության անբաժանելի մասը: Մեր երանաշնորհ հայրերը հոգեմտավոր
մեր հարուստ ժառանգությամբ ուսուցանել եւ իմացության ու գիտելիքի
լույսն են փոխանցել նոր սերնդին՝ հայորդյաց սրտերում ամրապնդելով
սերը եւ նախանձախնդրությունը հայրենիքի եւ մեր սրբազան արժեք-
ների հանդեպ: «Բոլոր չարիքները մարդու միտքն են մտնում տգիտու-
թյունից», - զգուշացնում է Սուրբ Եղիշե վարդապետը Ավարայրի ճակա-
տամարտը նկարագրող իր մատյանում: Այս համոզումով ու գիտակցու-
թյամբ են առաջնորդվել կրթության գործին լծված ազգիս նվիրյալ մշակ-
ները՝ մերժելով խավարն ու ջատագովելով մտքի լուսավորությունը եւ
առաջնային նկատելով հոգեւոր-ազգային նկարագրով մարդու ձեւավոր-
ումը: Այս առաքելության առաջամարտիկները աստվածասեր ու հայրե-*

նանվեր Սուրբ Թարգմանիչ վարդապետներն էին, միջնադարյան մեր համալսարանների ու վարդապետարանների ռաբունապետներն ու կրթական օջախներում ուսանած լուսամիտ սերունդները:

Արձանագրած նշանակալի ձեռքբերումներով նրանք առաջատար էին ժամանակի գիտություն ու կրթության ոլորտներում: Հայոց վարդապետներն անձնուրաց գործունեությունը ամբողջանվեր ծառայում էին ազգին ու մեր Սուրբ Եկեղեցուն՝ կրթությունը միջոց համարելով աստվածասեր ու հայրենանվեր ոգի ու նկարագիր կերտելու եւ ազգային ինքնությունը պահպանելու համար: Այսօր էլ Հայոց Եկեղեցու կրթադաստիարակչական սրբազան առաքելության տեսլականը նույնն է: Սակայն նկատելի է, որ մեր երկրի կրթական անդաստանում որոշապես տկարացել է ազգային արժեհամակարգով նոր սերունդներին կրթելու անհրաժեշտության գիտակցությունը: Ներդրվող կրթական նոր չափորոշիչներով նվազեցվում է նոր սերնդի ազգային ինքնագիտակցության ու հոգեկերտվածքի կարեւորությունը, ինչը խոցելի է դարձնում մեր զավակներին համաշխարհայնացման գործընթացներում:

Հիրավի, դժվարին ժամանակներ ենք ապրում. դարերի բովում հղկված եւ մեր ազգի կյանքում արմատացած արժեքները մեր օրերում աղավաղվում են, եւ փոխարենը անցողիկ եւ վնասակար գաղափարախոսություններ, երեւոյթներ ու դրսեւորումներ են ներմուծվում հասարակական կյանքից ներս՝ ստեղծելով նաեւ հոգեբարոյական ճգնաժամ: Նոր տեխնոլոգիաների սրընթաց զարգացմամբ, ինչպես եւ մարտահրավերներով ու փորձություններով հատկանշվող ժամանակակից աշխարհում կենսականորեն կարեւոր է ազգային ինքնության ձեւավորմանը եւ պահպանմանը միտված մրցունակ կրթության ապահովումը՝ հատկապես կրթական ծրագրում ընդգրկված առարկաների շարքում հայրենագիտական առարկաների պատշաճ դասավանդումն ու մշտամնա արժեքների փոխանցումը մեր զավակներին: Անընդունելի եւ դատապարտելի է, որ կրթական նոր համակարգում կառավարության եւ կրթական ոլորտի պատասխանատուների որոշմամբ այլեւս չի լինելու ժամանակի քննությունը հաղթահարած, աշակերտների եւ նրանց ծնողների կողմից սիրված, ազգային նկարագիրը, ոգին ամրացնող ու արժեհամակարգ սերմանող «Հայոց Եկեղեցու պատմություն» առարկան: Այն նորանկախ մեր պետության կրթական ասպարեզի կարեւոր ձեռքբերումներից էր, որի ավանդման գործում եւս Եկեղեցի-պետու-

թյուն գործակցությունն արդյունավորվել է հայրենաշահ եւ հոգեշահ տարբեր ձեռնարկներով:

Կրթության սիրելի մշակներ, այսօր ձեզ է վստահված մեր սերունդների կրթությունն ու դաստիարակությունը, նրանց մնայուն արժեքներ փոխանցելը եւ հայկական դիմագիծ ու դրոշմ ունեցող ազգի զավակներ կերտելը: Երբեք չվհատվեք եւ չընկճվեք փորձություններով ու մարտահրավերներով լի այս դժվարին ժամանակաշրջանում: Ձեր գործը քաղցր է, ձեր ճանապարհը թեեւ դժվարին, բայց պատվաբեր, նշանակալի ու երախտարժան: Ձեր աչքի առաջ ունենալով Սահակ-Մեսրոպյան փաղանգին, երանաշնորհ վարդապետներին ու կրթության բազում նվիրյալների՝ առավել սիրով եւ նախանձախնդրությամբ շարունակեք աստվածահաճո ձեր առաքելությունը՝ ի շահ մեր սիրելի զավակների եւ ի բարօրություն մեր ազգի ու պետություն:

Հիշարժան այս օրը կրկին հայրական Մեր գնահատանքն ենք բերում ամենքիդ ձեր գովարժան ծառայության համար՝ մաղթելով աննկուն կամք, նոր իրագործումներ: Թող ձեր ցանած բարի հունդերը առատ պտուղներ եւ արդյունք տան՝ հանուն մեր կյանքի առաջընթացի եւ մեր նոր սերնդի լուսավոր ապագայի:

Աղոթում ենք, որ Ամենակարող Աստված անսասան պահի Հայոց աշխարհը եւ լուսավորչահիմն մեր Սուրբ Եկեղեցին եւ Իր Սուրբ Աջի ամենախնամ հովանու ներքո պահպանի ու շնորհազարդի աշակերտ եւ ուսանող մեր զավակներին, զորակից լինի իմացություն ու գիտելիք մատուցելով կրթության մշակներին՝ պարգեւելով մշտանորոգ հաջողություններ:

Բարի, օրհնյալ ուսումնական նոր տարի:

ԳԱՐԵԳԻՆ Բ.

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

